

4.º As infraccións cometidas e as sancións impostas en aplicación desta lei, con especificación do rendemento económico producido por estas.

Disposición derradeira primeira. *Fundamento constitucional.*

O título I, as disposicións adicionais primeira, segunda, terceira e cuarta, esta última en relación co artigo 4, dítanse ao abeiro do artigo 149.1.1.ª, sen prexuízo das competencias que, por razón do ámbito material lles corresponden ás comunidades autónomas, para acometer as medidas lexislativas e executivas necesarias para conseguir unha igualdade efectiva das persoas con discapacidade en cumprimento dos artigos 9.2 e 14, en relación co artigo 49, da Constitución.

Os restantes preceptos desta lei son de aplicación unicamente á Administración xeral do Estado.

Disposición derradeira segunda. *Entrada en vigor.*

Esta lei entrará en vigor aos tres meses da súa publicación no «Boletín Oficial del Estado».

Por tanto,  
Mando a todos os españois, particulares e autoridades, que cumpran e fagan cumprir esta lei.

Madrid, 26 de decembro de 2007.

JUAN CARLOS R.

O presidente do Goberno,

JOSÉ LUIS RODRÍGUEZ ZAPATERO

**22294** LEI 50/2007, do 26 de decembro, de modificación da Lei 43/1998, do 15 de decembro, de restitución ou compensación aos partidos políticos de bens e dereitos requisados en aplicación da normativa sobre responsabilidades políticas do período 1936-1939. («BOE» 310, do 27-12-2007.)

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei:

#### PREÁMBULO

A Lei 43/1998, do 15 de decembro, tivo por finalidade realizar un acto de xustiza histórica como é o de devolución aos partidos políticos daquilo que lles foi arrebatado, ou de reparación dos prexuízos patrimoniais que sufriron, dándolles, por outra parte, un trato idéntico ao xa dado no seu día ás organizacións sindicais.

Os case sete anos de vixencia da lei permitiron comprobar a existencia de diversas dificultades á hora de proceder á súa aplicación.

É, por iso, tempo oportuno para efectuar unha reforma que corrixa aquelas dificultades técnicas e de orde procesual, co propósito de que a lei poida servir eficazmente á finalidade para a que foi promulgada no seu día.

Para iso, fundamentalmente, introdúcense principios, normas e trámites existentes noutros ámbitos do noso ordenamento xurídico, e que son ordinariamente aplicables en moí diferentes procedementos administrativos.

**Artigo único.** *Modificación da Lei 43/1998, do 15 de decembro, de restitución ou compensación aos partidos políticos de bens e dereitos requisados en aplicación da normativa sobre responsabilidades políticas do período 1936-1939.*

A Lei 43/1998, do 15 de decembro, de restitución ou compensación aos partidos políticos de bens e dereitos requisados en aplicación da normativa sobre responsabilidades políticas do período 1936-1939, queda modificada nos seguintes termos:

Un. O artigo 1 queda redactado nos seguintes termos:

«Artigo 1. *Restitución de bens ou dereitos de contido patrimonial.*

1. O Estado restituíralles, nos termos establecidos nesta lei, aos beneficiarios previstos no artigo terceiro, os bens inmoebles e dereitos de contido patrimonial, incluíndo saldos en efectivo e arrendamentos de que son ou foron titulares e que foron requisados a partidos políticos ou a entidades a eles vinculadas aínda cando non tivesen personalidade xurídica propia, en aplicación do Decreto do 13 de setembro de 1936, a Lei do 9 de febreiro de 1939, a Lei do 19 de febreiro de 1942 e a Orde do 9 de xuño de 1943.

Non procederá a restitución de bens móbiles, nin o aboamento, indemnización ou compensación polos froitos e rendas deixados de percibir desde o momento da incautación, nin polos dereitos de contido patrimonial derivados da perda de dereitos persoais.

2. Procederá igualmente a restitución ou compensación pola perda de bens e dereitos radicados fóra do territorio español.

Neste suposto a titularidade será acreditada segundo o establecido nesta lei.

3. O Estado indemnizará, así mesmo, nos termos desta lei os beneficiarios previstos no artigo terceiro, pola perda dos seus dereitos de contido patrimonial producida en virtude do disposto no artigo 3 da Lei do 9 de febreiro de 1939.»

Dous. Engádesse un artigo 1 bis, coa seguinte redacción:

«Artigo 1 bis.

1. Ademais dos bens e dereitos considerados no artigo anterior serán obxecto de compensación aos beneficiarios establecidos no artigo terceiro:

a) A perda ou privación definitiva do uso ou desfrute de bens inmoebles en concepto de arrendatario.

b) A incautación, fidedignamente acreditada, de saldos en efectivo en contas e depósitos en entidades bancarias e financeiras legalmente autorizadas para operar como tales na data da incautación, sempre que as ditas contas e depósitos figurasen a nome dos beneficiarios establecidos no artigo terceiro e a incautación fose consecuencia da aplicación da normativa a que se refire o artigo primeiro, parágrafo primeiro.

2. O importe da compensación será o que resulte de actualizar a contía requisada segundo o índice do valor constante da peseta e do euro elaborado polo Banco de España.

3. O importe total máximo que se aboará por beneficiario será de 4.000.000 de euros polos dous conceptos compensables a que se refire o punto primeiro.»

Tres. O primeiro parágrafo do punto 1 do artigo 2 queda redactado nos seguintes termos:

«1. Se os bens ou dereitos a que se refiren os artigos anteriores non puidesen ser devoltos total ou parcialmente por non quedaren suficientemente identificados, por pertenceren a terceiras persoas distintas do Estado, por estaren no suposto considerado no artigo 7 desta lei, ou por calquera outra causa, o Estado compensará pecuniariamente o seu valor tendo presentes criterios de mercado.»

Catro. Engádesse un novo punto 3 ao artigo 3 coa seguinte redacción:

«3. Non procederá a restitución nin a compensación no caso dos partidos políticos que fosen declarados ilegais, disoltos ou suspendidos xudicialmente. Tampouco procederá no caso dos partidos respecto dos cales se iniciase o procedemento para a dita declaración ou se anulasen algunhas das súas candidaturas en virtude do previsto nos artigos 9 a 12 da Lei orgánica 6/2002, do 27 de xuño.»

Cinco. Engádesse un artigo 5 bis, coa seguinte redacción:

«Artigo 5 bis. *Proba.*

1. A titularidade daqueles bens ou dereitos pertencentes aos beneficiarios a que se fai referencia nos puntos anteriores poderá ser acreditada por calquera medio de proba dos admitidos en dereito.

2. Cando non se poida dispoñer dos datos necesarios para a determinación plena dos bens e dereitos perdidos ou requisados, do título ou data da súa posesión, ou do seu valor, poderanse estes determinar mediante a utilización daqueles elementos probatorios que indiciariamente os acrediten. Poderanse aplicar, se é o caso, as presuncións sobre titularidade de dereito previstas na lei e, particularmente, na lexislación tributaria e na lexislación de expropiación forzosa.»

Seis. O artigo 6 queda redactado nos seguintes termos:

«Artigo 6. *Tramitación e resolución de solicitudes.*

1. A tramitación das solicitudes de restitución ou compensación dos bens e dereitos a que se refire esta lei levaraa a cabo a Dirección Xeral do Patrimonio do Estado, que instruirá os oportunos expedientes de acordo co procedemento que regulamentariamente se estableza e propondrá as valoracións dos bens e dereitos para os efectos compensatorios previstos nesta lei.

A resolución dos procedementos incoados, que será motivada, corresponderalle ao Consello de Ministros, logo de informe e por proposta da citada dirección xeral, a través do Ministerio de Economía e Facenda, acordando a desestimación ou a restitución total ou parcial ou o dereito á compensación, e a declaración de restitución constituirá título suficiente para a inscrición dos bens e dereitos no Rexistro da Propiedade.

2. Naqueles casos en que, acreditándose o prexuízo patrimonial sufrido polo partido político, non se puidese determinar nin sequera por medios indiciarios a totalidade dos seus elementos, o Consello de Ministros poderá fixar equitativamente unha compensación.»

**Disposición transitoria.** *Novo período de presentación de solicitudes.*

Para que os partidos e agrupacións políticas beneficiarios dos dereitos a que se refire esta lei poidan presentar

novos documentos probatorios, abrírase un novo prazo dun ano para a presentación das solicitudes pertinentes desde a entrada en vigor da lei.

**Disposición derogatoria única.**

Quedan derogadas cantas disposicións de igual ou inferior rango se opoñan ao establecido nesta lei.

En particular queda derogada a disposición adicional da Lei 43/1998, do 15 de decembro.

**Disposición derradeira primeira.** *Desenvolvemento regulamentario.*

O Goberno, no prazo de tres meses a partir da entrada en vigor desta lei, e por proposta conxunta dos ministerios da Presidencia, de Xustiza e de Economía e Facenda, desenvolverá regulamentariamente o disposto nela.

**Disposición derradeira segunda.** *Revisión de expedientes de devolución.*

O Consello de Ministros poderá revisar de oficio, atendendo aos criterios establecidos nesta lei e con audiencia dos partidos ou agrupacións políticas solicitantes, os expedientes incoados conforme a Lei 43/1998, do 15 de decembro, emendando os erros ou desviacións padecidos en aplicación dos valores catastrais, cando estes non se basearen en relatorios actualizados ou, se é o caso, cando a facenda correspondente tivese establecido outro sistema para a determinación dos valores mínimos atribuíbles aos bens inmoables, axustándoos aos propios do mercado.

**Disposición derradeira terceira.** *Entrada en vigor.*

Esta lei entrará en vigor aos tres meses da súa publicación no «Boletín Oficial del Estado».

Por tanto,

Mando a todos os españois, particulares e autoridades, que cumpran e fagan cumprir esta lei.

Madrid, 26 de decembro de 2007.

JUAN CARLOS R.

O presidente do Goberno,

JOSÉ LUIS RODRÍGUEZ ZAPATERO

**22295** *LEI 51/2007, do 26 de decembro, de orzamentos xerais do Estado para o ano 2008.* («BOE» 310, do 27-12-2007.)

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei:

PREÁMBULO

I

Os orzamentos xerais do Estado fundamentan o seu marco normativo básico na nosa Carta Magna, a Constitu-